

Bingzgoj: Gyoengq Beksingq Gyaez Hag Sawcuengh

Ndwen 6 ngoenz 5 doengxhaemh, aen ban Bingzgoj Si daihngeih geiz goeng' ik sonhag Sawcuengh Fwencuengh hwnjdanz lo, 48 boux hagseng daj ndaw si gak hangznieb daeuj ndaw dangz hagsib. Aen ban Bingzgoj Si daihngeih geiz goeng' ik sonhag Sawcuengh Fwencuengh dingh youq bi 2020 ndwen 1 ngoenz 18 haiban, hoeng, aenvih fat binghraq bwtndat, itcig mbouj ndaej haigoq, seizneix daengx guek binghraq menhmenh hoizsoeng, gyoengq hagseng gig siengj haigoq. Sonhag cungsim lai dingq yigen, mizgven bouhmonz doengzeiq haigoq. Haigoq le, gyoengq hagseng yaek youq 6 nyied daengz 9 nyied geizgan hag sing、yinh、diuh Sawcuengh caeuq coenzvah、fanhoiz、govwnz Sawcuengh daengj cihsiz.

(Dwngz Dwngz/滕 腾)

► 48 boux hagseng daj ndaw si gak hangznieb daeuj dingqgoq hagsib.



Hocouh: Lajmbanj Hwng Yienjheiq Vwnzva Saedceij Vunzlai Hoengh

Ndwen 6 ngoenz 3, daiz heiq comzyienj roengz lajmbanj yienj hawj vunzlai yawj ndeu youq Hocouh Si Vwnzva Yisuz Cungsim haiyienj, gyoengq bouxbiujyienj daj gak yienh gak gih caeuq gak aen danhvei、hagdanz daeuj haenx, youq gwnz daizheiq cienggo、ndaek ginz、diuqfoux. Aenvih cingqbungz seiz fuengzre binghraq, daiz heiq comzyienj neix couh youq gwnz muengx cigboq yienj. Gvangsiah daiz heiq comzyienj roengz lajmbanj yienj hawj vunzlai yawj neix gaenq banh ndaej 7 gaiq, moix gaiq cungj nyoenx ok buek cozbij ndei ndeu, caemhcai raen miz haujlai vunzcaiz maenhndei.

(Liu Cujbingz/廖祖平)



▲ Bouxbiujyienj youq gwnz daizheiq diuq foux Yauzcuz 《Liengja》.



▲ Nungzhoh Dungcuz bwh huqdoj gag ndaem daeuj gai.

Sanhgyangh: Gai Huqdoj Bonjdieg Ndaej Demsou Duetgungz

“Byasoemj neix dou louz ndaej sam bi lo, gaen 45 maenz, gai ndaej riengjret!” Ranzgungzhoj Gyaj Cuzyingh itmienh gai bya itmienh gangi, de daj Sanhgyangh Dungcuz Swciyen Fuluz Myauzcuz Yangh Dasun Cunh daeuj. Ndwen 6 ngoenz 6, Sanhgyangh bi 2020 siufeiq banggungz caeuq gij huqdoj aen mbanj gungzhoj canjsiuhvei youq Dohyeh Gvangcangz gawjhengz, 15 aen yanghein Dungcuz cungj miz danhvei daeuj baijdan, gyoengq beksingq doxcanj daeuj cawx haeuxcid、mbawcaz、gaeqdoj bitdoj、byasoemj bitsoemj. Bi 2020 dwg bi Sanhgyangh daengx yienh duetgungz ndeu, banh hozdung gai huqdoj bonjdieg neix, bang mbanj gungzhoj soh ndaej gai gak yiengh huqdoj、dap aen bingzdaiz doxyaeng, hawj huqdoj bonjdieg ndaej gai okbae.

(Gunj Yicungh/滚亿忠 Veiz Yizginz/韦日勤)



▲ Lungzswng Gak Cuz Swciyen Swsuij Yangh Couhgyah Cunh gyoengq mehmbwk Yauzcuz hag minzfazdenj.

Lungzswng: Hag Minzfazdenj Banh Saeh Habfap

Ndwen 6 ngoenz 4, bouxguh Hong Lungzswng Gak Cuz Swciyen Swsuij Yangh haeuj mbanj haeuj ranz, doenggvaq doeg bauqceij、vangjloz hagsib、yawj densi, yiengq gyoengq–vunz dangdieg cienz doh minzfazdenj cihsiz, cungdenj gangi bien vwnhyinh gyadingz、bien ciepswnj、bien cwzyin ciemqgienz daengj, son' gyaug daz–yinx vunzlai rox minzfazdenj dwg aen fazdenj baujhoh gij gienzik bonjfaenh, hix dwg gij gveihfan daengxcungq ndawbiengz itdingh ciuqsouj, hawj vunzlai cauxbaenz gij nyinhrox caeuq sibgvenq gag rox souj fap、bungz saeh ra fap.

(Vuz Swnghbinh/吴生斌 Yiz Linzyi/于琳钰)